

欽
定
全
唐
文

欽定全唐文卷四百十七目錄

常袞八

久旱陳讓相表

代裴相公讓河南等道副元帥表

謝讓加銀青福建觀察使表

代杜相公讓劔南元帥表

代杜相公讓河南等道副元帥表

第二表

代擬宰相謝加銀青并郡公表

代裴相公讓將相封爵表

第二表

代王尚書讓官表

第二表

謝除考功郎中知制誥表

讓門下侍郎平章事第一表

第二表

代嚴大夫讓黃門侍郎表

爲福州刺史謝上表

潮州刺史謝上表

欽定全唐文卷四百十七

常袞^八

久旱陳讓相表

臣某言臣聞陽倡陰和合之則理任重力寡強之則顛苟稱竊位何所逃責伏惟陛下以大聖之資除去奸惡臣荷承正刑之後擢在台衡不能有所建明坐致災旱燮理之任虧紊固多邦畿之間愆亢特甚陛下發勤閔之慮躬旰晷之勞大憂庶獄並走羣望而踰夏涉秋天則不雨垂落復散人其謂何伏以東漢之制存乎舊史或陰陽失節水

旱不時必策免三公勵精百揆蓋以其陽倡而不和力薄而位崇所以答天譴也今上元赫赫如此舊史昭昭如彼臣尚以愚劣偷安廟堂負乘不慙覲冒難處伏乞解臣所職更擇良才省致旱之由求作霖之輔則萬姓咸賴百穀用成上寬聖憂下塞人望臣敢尸位重祿以負明時無任兢惶惕厲之至

代裴相公讓河南等道副元帥表

臣某言伏奉今月恩制以臣兼東都留守河南淮西山南東道副元帥伏以東征之寄相宅之選皆周召之臣保釐

統一也故二南風化見美詩人況洛邑經陸渾之戎有舊
染之俗賴陛下發皇明以燭之布陽和以煦之流散稍歸
傷痍甫起然稱君師之任宜得經濟之才自河而南至於
吳楚節制戎律半乎天下非宏畧傑出功冠一時不可以
專五侯九伯之征總衣裳兵車之會臣以衰朽薄劣待罪
台司塵辱尸忝無裨朝政每趨宸陛益愧周行豈謂殊常
之恩屢出非望注意之責并在微軀憂懼慚惶寸刻難措
臣聞惟名與器不可假人審已量力未宜虛授若貪榮冒
寵黷勉苟容神明昭昭必速其害伏望歷求百辟委之兼

才以分三老之任用增九鼎之重則至公大行羣下知勸
無任懇迫之至

謝讓加銀青福建觀察使表

臣某言伏奉五月二十五日恩制授臣銀青光祿大夫使
持節都督福建諸軍事福建刺史充福建等州都團練觀
察處置等使以今月二十一日至所部上訖臣負恩至深
睿慈曲宥待罪猶近殊渥薦臨蕩滌瑕累超遷方任寵榮
非次荷懼失圖臣誠恐誠喜頓首頓首臣本性下愚起自
孤賤代耕之望心在於斯經遠之謀實非所及先朝驅策

以奉綸言曲承眷私累漸階厯遂參重務有數彝倫未申
報効永負天地孽由自作罪在難容伏以宸斷察微聖慈
憫下抑羣議以屈法捨萬死以矜愚猶委藩條不坐親屬
如臣之比前例所無戴感兢惶殞越無措誓將沒齒効職
南荒刻責自新庶補前咎常恐惡聲已被有汙於史冊朽
骨縱歸實穢於泉壤豈謂天波一洗塵渣忽除面目何施
灰粉亦足聖朝使過始有庸臣特賜崇階超授連率減論
之貸曾未周星錄用之榮頓極今日素多孱劣又乏幹能
將何以式遏外虞澄清列郡幸遇德音頻降霈澤普覃惠

恤困窮均省財賦盡除疾苦莫不昭蘇海隅蒼生自樂淳
化臣奉宣清問遠布皇猷老少懷安抃躍相慶臣才非所
任不敢冒榮必招無德之殃恐致負乘之寇伏請削除三
品退守一州冀循恒資免至踰分庶迴宸鑒俯恤血誠所
忝榮班請授能者無任戰荷懇迫之至謹差特進試鴻臚
卿臣郝誠溢奉表謝恩陳乞以聞

代杜相公讓劔南元帥表

臣鴻漸惶恐言臣本自諸生素乏經邦之具無才無行至
愚至拙其所望者在寸祿代耕而已往屬先帝中興時方

草昧攀附日月遭逢盛時獲奉馳驅遂蒙委遇毫髮未報
哀惶靡及陛下龍飛踐阼俊乂滿朝猶顧微臣使參大政
備位宰輔出入六年上不能調和陰陽下不能親輔百姓
朝典隳廢聖慮憂勞其心愧恥中夜三歎況外統羣帥遙
制戎閫在臣懦劣非所堪任曩者受命而行屬西南未安
中外所注雖有危難臣不合辭崔寧頃至朝廷親授經畧
及還方鎮事頗條理叔明獻恭並是良將自蒙擢用甚允
聲實可以倚辦並堪獨任且將在閫外事得專之遠道取
決恐失要會坐而臨制誠亦非宜今又靖謐臣何所効豈

苟貪榮利以固寵恩蓋鎮撫四夷宰相之任也陛下不以臣薄陋待罪鼎司至於疆事不休戎車不息實得參議任其安危無以裨補皆臣之罪也何必一方之務獨有責成特乞下鑒愚懇俯停戎號則王朝無兼授之寵臣下有知止之分昧死上言冀迴宸睠無任惶迫屏營之至謹奉表陳露以聞

代杜相公讓河南等道副元帥表

臣某言伏奉今日恩制以臣兼河南江淮山南東道副元帥祇奉詔書俯伏流汗驚悚惶灼若無所容臣某誠惶

誠恐頓首頓首臣聞將帥者四方之守中夏垣翰也上以
衛社稷外以撫戎夷國容不入於軍閫戎事得專其將命
漢讓韓信以安危存亡之地齊擢穰苴以文武威附之名
所授既難所責亦重非才而處鮮不敗事臣固陋無識蒙
國厚恩遭時備位塵辱華袞見貽匈奴之哂不副蒼生之
望效拙無補六年曠官陰陽愆和政理乖度金革未戢水
旱相乘常待罪於策免敢希恩於望外臣所以徘徊渥澤
尚忝中樞豈持祿保身苟自容也以其瀝誠未鑒不敢固
辭頃者即戎巴蜀總制羣師屬兩川未安遂任憂責而邊

患稍息方隅甫寧此蓋憑神武之威用廊廟之策不然者將顛沛是懼豈望於天幸哉陛下覆之如天容之如地矜其疾病察以愚懇特蒙優詔獲上兵符喜抃未寧遽承新命東南至海俾護諸軍外綏四國專制萬里以天子二老之任會諸侯九合之師事之濟否所繫尤大在臣懦劣非所克堪誠願飾愚磨鈍展効毫髮以報所授之恩以勤所忝之職而器非所適力又不任加之衰老事多廢忘豈可訓師詰禁以張威武伏冀求方叔南仲之賢授統一專征之寄天下大柄豈私於臣實恐傷陛下之知人干處士之

橫議誓將死請輒露血誠輕黷威嚴庶迴宸斷無任懇款
屏營之至

第二表

臣某言伏以智小識淺懇辭新命德音緬邈聖旨如初憂
悸慙惶寸陰難處情有所迫再黷宸嚴冀天光之下濟期
夕殞之無恨臣某誠惶誠恐頓首頓首臣聞以賢授任猶
誠盈滿無德而祿固宜勇退如或不量其分苟患失之貪
榮冒寵以曠職事禍之所伏亦可畏也臣孤陋疵賤自視
缺然遭遇盛時謬此榮達得以貂蟬袞服趨侍雲陛擁旄

仗節統護戎師崇班厚遇頓極於此退自惟省夙夜慙惶
內曠論道經邦之位外乏濟河登山之功但終恩眷萬不
酬一四方歸責喧喧盈耳陛下矜其不逮近罷即戎未踰
旬時又辱謀帥私懷爽絕以驚以怖昔光武見事於千里
之外諸將授成算而已陛下聰明神武超然過之戡濟多
難犬戎大定今天下方鎮東南最寧但委之將守授以經
畧自可致理又何足虞豈必以不才之臣竊非據之位加
之衰憊難於力強陛下知人則哲憫臣竊位之愚固當降
殊私之貸開至公之選倘以懦敗事謗缺上聞雖欲宥之

其可及也昧死陳乞庶鑒愚誠祈於必從不敢有隱伏冀收春雨之既降迴朝陽而見燭俾不能者止實望於曲成之仁也無任懇迫屏營之至

代擬宰相謝加銀青并郡公表

臣某言伏奉今日制書加臣銀青光祿大夫特封河南郡開國公食邑二千戶承命戰驚伏詔惶駭拜抃無次感涕失容中謝臣累代宗儒傳經素位所以勉修學藝將業其官而文愧承家識非半古本期代耕之祿稍階載筆之地幸參近署久侍內朝謬霑雨露之恩頗甄歲月之効獲承

大命謝謬訓之規載忝有司無辯論之實既虛職守常懼
滿盈無日不思每期負敗當時同列咸所明知豈意朝廷
方正於紀綱天地忽思於微細擢升佐輔望出羣情陳乞
靡從曠廢何甚在萬邦之化育處百辟之儀刑出自諸生
猥當非據所以風雨愆候歲穀不登邊檄交馳田租減耗
凡此數事職臣之由歷觀舊典合貶優秩累因陛下奏獻
封章天威俯臨愚誠屢奪雖瀝懇無報期至誠必通上仰
於朝庶幾諧願受策於第是所甘心方祈獲免之時更遇
非常之賜特承七命之貴超過八階仍叨五等之榮坐封

千里雖庭堅謨弼之德山甫將明之才榮遇今恩亦稱踰
分況臣道慙先哲識類平人未遂退還已紆聖眷頻煩寵
拜實懼神明伏乞俯照血誠特迴睿旨夫上有無功之授
則下多不勸之嫌涓滴之勞未彰於近掖風塵之議已集
於遠方所以撫心疚懷不敢奉詔拜手流汗詎容飾詞無
任慙惶之至

代裴相公讓將相封爵表

臣某惶恐言臣聞無德而祿殃咎必至又鬼神害盈而福
謙蓋經籍之明言聖哲之垂誠也臣儒門孤賤行拙性愚

自甘散棄豈望榮達時來驟進任遇頗重備位將相無補
聖朝道惡其滿天與之疾素有氣癖兼之風眩又多煩躁
事劇則昏伏以軍國重務猥承參決強策駑朽以親事任
精爽潛耗病源益深近日有加曠旬彌滯食不知味所進
殊少形神憔悴惘惘不樂聖慈憐憫曲念微生御膳名醫
屢蒙降錫霈然有喜載感於渥恩終亦無瘳復增其沈痼
豈不以祿秩過量憂負在心強其不逮之分促其有終之
限以茲速戾固亦明徵且臣子之急必告君父在臣今日
實堪憐憫以陛下之知臣豈獨厚其爵位也以陛下之念

臣豈不存其骸骨也臣以冒寵則鄰於危殆辭榮則安於攝衛伏冀特迴宸眷俯察愚誠削除官爵使養衰疾庶垂白之年受賜於陛下生成之德有過於天地無任懇迫屏營之至

第二表

臣某言伏以衰疾沈綿久曠樞務憂惶迫切不敢自安所以昧死讓將相列侯印綬披瀝丹愚再有陳乞顧景待命還旨如初窮情未達轉益危困臣誠惶誠恐頓首頓首臣內顧微躬自量拙分無片善可取無一事可稱皆緣際會

參務軍國尸榮竊位公責所歸且智小謀大鮮不敗事福
過災生常然之理一自嬰瘵旬朔未瘳大減服食晦明異
候竊料氣力衰憊恐先犬馬乞遂閑退庶安形神且臣素
疵賤敢期貴達常慮薄質不堪重任今祿位俱極過逾涯
分致此沈痼得非害盈思自損抑冀通神理又不親政事
厯受寵榮廢公曠時益用慙懼所以塵黷旒宸至於再三
情迫於茲敢有所隱愚樸之性陛下素知加以危頓豈容
矯飾伏望罷其新授貸以殘生昔漢魏近臣有以暮年久
疾者則賜告就第或再起復位若大限未盡羸疴漸平聖

慈不棄驅策非晚重得珥貂丹禁條紫玉墀則微効獲伸
所乞無幾如或殆至深慮何必暫榮儻生遂其志沒無所
恨矣實冀皇天聽卑於在上太陽迴舍於生成俯納誠祈
退令攝衛衰朽餘齒殊私曲全受賜則多生涯之幸臣無
任懇迫之至

代王尚書讓官表

臣某言臣聞綆之短者無以汲深馬之疲者無以致遠臣
實凡淺素乏器能爰自效官累蒙驅策服勤中外三十餘
年始奉將作遽加節制叨尹京觀之任兼副八座之權空

勵驚鈍竟無補裨陛下寬其罪戾特見優容尚列周行更
升榮級臣以殿中監依前檢校刑部尚書未經數月又集
賢待制豈臣才能及此皆是明主曲成感戴殊私不忘寢
食誓將竭節以報國恩而去歲以來累嬰沈瘵形神久殆
筋力漸微在假日多朝天未克顧惟所職倍益兢惶地近
宮闈事繁供應統茲六尚之務不可一日缺人以臣之曠
所害尤甚雖欲匍匐就列支持守官力所不任難於自勉
伏乞矜臣不逮許停此官在臣血誠實惟志願無任懇迫
之至

第二表

臣某言臣聞爲臣事君貴於無隱情有所切必以上聞苟易茲道即非盡節臣以衰憊形貌支離自冬徂春心勞力竭竊料旬月之內未能趨拜闕庭殿省務殷實憂廢失昨以所瀝上請乞罷此官天路高深未能允納伏覲墨詔冰炭交懷且人之立身大抵榮祿蓋有欲之而不得未有得之而願辭今臣務總六尚位雄九列往來中禁輝映當朝在臣私門實深慶幸若力能奉職智可効官豈敢罔冒天聽堅爲飾讓推之物理況見愚衷又臣疇昔之志每懷勤

恪比雖綿惓倍益殷憂小有供擬盡關心慮以茲重困轉覺疲羸伏乞天慈察臣不逮儻獲免所職俯救沉疴生成之恩無以堪比無任懇迫之至

謝除考功郎中知制誥表

臣哀言伏奉去年十二月二十六日恩制授臣考功郎中餘如故猥降詔書特榮新命祇荷殊造若無所容臣哀誠惶誠恐稽首頓首臣本諸生素虧令望憑藉儒業遭逢聖時幸從彝序累踐清秩得以文墨侍於軒墀五字非功四年待罪禁垣之右朝奉如綸宸扆之前夜參視草以地尤

密惟才必精在臣無堪忝跡斯甚食浮之議所責何逃陛下宏獎文儒優容侍從恕其職事之闕錄以歲時之深爰錫朝章俾遷郎位典掌如舊寵榮有加翱翔雲霄沐浴雨露俯伏拜賜心靈若飛効薄恩崇罔知攸措何以上報期於死節無任感戴屏營之至

讓門下侍郎平章事第一表

臣哀言伏奉今日恩旨除臣門下侍郎平章事祇奉失圖進退無據捧詔驚駭銜恩戰惶微存懇誠得自陳露臣某誠惶誠恐頓首頓首臣本書生粗傳舊業猥以文藝辱於

職官去歲已前尚忝絲綸之末今年夏首遂登鈞石之司
舊德名臣當朝宿齒不忝此選獨進非才撫已再思何顏
自處伏以朝廷新有處分重舉典章而上稟睿謀下清庶
品通於元本猶懼匪服之嫌訪於顓蒙將貽覆餗之責伏
乞俯迴天鑒更擇時賢則三階有協贊之功兩府無尸曠
之誚無任恐惶之至

第二表

臣袞言臣退省無堪恐辱寵授是以昧死上言拜手稽首
讓於百辟卿士冀迴宸鑒以遂至公鴻私復降墨詔未允

慙報惶怖不知所圖臣某誠惶誠恐稽首頓首臣聞左右
惟賢國安在相處儀表之地當興化之源故有開必先元
感幽贊軒皇則三台作配虞舜則五老同游殷夢帝而得
說周降神而生甫用能洽皇王之道致天地之和至於漢
興亦用人傑爰及江表猶擇偉才當此大任固非常品臣
性惟愚拙才無經濟徒以趙宮覩聖逮事先朝潁川扈蹕
獲承中顧凡所履歷莫非塵忝出於始望之外不知自至
之由豈謂元造曲成大明私照俾佐邦政得參廟謀竊以
當今樞務之重在昔上公之任臣識非通博不可以論道

文非雅正不足以經邦德不能鎮撫四夷政不能親附百姓況戎車尚駕邊患未寧方欲宏濟艱難以崇大化故非齷齪廉謹所能稱職若不自揣度苟貪寵榮寧止尸官備員期於鼎折棟撓伏乞訪求羣議選用上才使聖朝有則哲之明臣下無虛據之責躅天跼地誓將死請如或聖眷俯迴實亦天下幸甚無任懇迫屏營之至謹奉表陳乞以聞

代嚴大夫謝黃門侍郎表

臣武言伏奉今月十八日恩制除臣黃門侍郎忽降紫泥

擢升黃閣出自非望感恩戰懼臣其中謝臣才乏經綸時
逢際會累更天秩何補聖朝三踐掖垣九除憲府有慙匡
正空忝觸邪犀節四持亂繩不理牙璋再建橫草無功既
曠職於神州又尸官於華省屬犬戎猾夏鑾駕省方未殄
國讎正當臣辱陛下分麾以討傳檄自安空隨冗從之流
竟乏橫行之議尚淹致命仍更冒榮方扈宸遊遽膺夕拜
久缺斯任永難其人本求英儒將備顧問素無學術何以
允諧竊汙軒屏謬塵瑣闥寵榮非望祇荷失圖恩重才微
難於捧戴眷深効淺祇益兢惶上答生成唯知死節無任

感戴屏營之至

爲福州刺史謝上表

臣某言奏事官特進試鴻臚卿臣郝誠溢至伏奉墨制優
答兼賜手詔宸旨寵臨榮渥光被跪讀流汗捧抃失容臣
某誠懼誠喜頓首頓首臣伏以聖慈宥過朝獎踰涯敢希
身榮以冒班列昧死陳乞冀遂愚誠天覆棄瑕藩寄如舊
宜勉駑鈍以効涓塵不敢稽恩有覲承命感戴欣躍仰荷
殊私踧踖戰兢實憂曠職謹當宣布德澤奉行科條苦節
以輯疲人誓心擬補前咎夙夜祇畏懲省微勤期於萬一

以申上報無任捧戴屏營之至謹奉表以聞

潮州刺史謝上表

臣某言臣冒犯刑章合當萬死曲蒙慈貸特賜再生仍假分符更承寵授感恩待罪心魂戰越以九月十一日到州上訖臣某誠惶誠恐頓首頓首臣凡賤末品非才冒榮虛忝國恩實昧朝典尸榮無補公責所歸竊自循省早宜謹黜永惟光顧未答殊私慙負至深衷惶靡及陛下以大聖承統以至明照臨孝思感於天地儉德齊於堯禹道在還淳化先無事臣宜進賢以報國同力以守公而乃輕奏忠

良苟循愚執豈非臣褊心失措躁遽而然亦是速戾之時
迷誤至此負恩至重自孽何逃處之嚴刑猶未逭責豈謂
特迴宸斷俯降天慈矜臣蠢愚憫臣孤弱全其將朽之骨
復其已逝之魂俾奉藩條獲從職守悚慄懼荷罔知所圖
臣自辭闕庭深省罪釁未嘗頃刻輒忘悔尤終朝再馳每
懷懲戒終夜不寐每思兢慙尚偷餘生誓將改過敢惜微
命以自懷安敬勵丹誠庶答鴻覆況親人之寄在遠尤切
謹當宣揚聖化慰撫海隅少安疲疇以展微効伏以差使
上謝有虧格文跼蹐憂惶不敢專擅無任懇迫之至謹附

本道觀察使便使奉表陳謝以聞

欽定全唐文卷四百十八目錄

常袞

九

謝銀青光祿大夫河內郡開國公第二表

爲李大夫謝恩表

謝兄授太子僕表

謝兄授祕書省著作郎表

謝贈官表

謝妻封宏農郡夫人表

爲李大夫謝御製詩表

金
謝賜緋表

謝進橙子賜茶表

謝內宴賜錦綵器物等表

謝端午賜衣及器物等表

謝端午賜衣及器物等表

謝社日賜羊酒等表

謝冬至賜羊酒等表

謝賜宴表

謝勅書賜臘日口脂等表

爲河南魏尹謝官陳情表

代崔公授祕書監致仕謝表

謝米麴羊酒等狀

謝勅書手詔狀

社日謝賜羊酒海味及茶等狀

重九謝賜餽酒等狀

謝每日賜食狀

謝賜鹿狀

謝賜甘蔗芋等狀

謝恩賜春衣狀

謝賜馬狀

進貞懿皇后哀冊文狀

欽定全唐文卷四百十八

常哀九

謝銀青光祿大夫河內郡開國公第二表

臣某言內侍喬獻德至奉示答臣所讓新授階封德音宜
即斷來表者臣自沐恩私不遑寢息所以上冒宸宸頓首
拜章漉懇于宴賜之辰披誠于對敷之次累煩睿覽下執
愚衷竊以榮級清階本因馭貴分茅錫土必在報功冀達
舊章非勤飾讓今天書再及嚴旨不移受詔兢惶撫躬震
越伏自思念戰汗交馳恐負聖睿之慈當審微臣之分何

者謬升非次既參二府之榮縱避今恩不減四方之責唯當勉申駑蹇恭守紀綱苟塵露之可裨雖灰壤而無恨重承嚴命不敢固辭此生甚微厚施何答無任惶懼感荷之至謹奉表陳謝以聞臣某誠惶誠恐稽首頓首謹言

爲李大夫謝恩表

臣某言伏奉聖恩捨臣罪戾復臣班榮承命驚慙戴恩惶抃臣某誠歡誠懼頓首頓首伏惟乾元光天文武大聖至德孝感皇帝陛下俯寬國法大庇宗枝兄抵憲章已從輕典臣合緣坐又貸殊私雷霆解威日月迴照枯木之上殘

花忽開死灰之中餘燼再熱曲承含育特荷仁慈一門感恩萬死何効謹奉表陳謝以聞臣某誠歡誠懼頓首頓首謹言

謝兄授太子僕表

臣某言伏奉五月十七日恩制授臣兄依前祕書省著作郎太子僕特恩曲降殊私下霑踴躍宛轉兢惶震越臣某誠歡誠喜頓首頓首臣自承錄用已積歲時內省微効未申涓瀝虛受祿俸有覲官榮在公無益已寬臣罪及私之幸又獎臣兄伏以頃冒朝章兄合同坐伏蒙慈貸仍進常

班卑賤孤門已墜復立烝嘗獲主將廢更存寵被幽明戴
感天日求之古今無臣此例雖肝膽塗地未塞前責而糞
土餘生尋加後命臣授方鎮兼錫崇階兄拜官僚又參高
秩慶聯雁序澤及翺飛承命若驚何功至此愧心踧踖赧
汗流離非望驟遷罔知所措殘骸萬死難以上酬無任感
荷兢抃之至謹遣散將某官某奉表陳謝以聞

謝兄授祕書省著作郎表

臣某言伏奉閏五月二十四日恩制授臣兄太常丞祕書
省著作郎臣待罪兢灼啟處不遑寵命薦臨驚抃失次臣

某誠喜誠懼頓首頓首臣上負國恩自抵邦憲聖慈矜宥
屈法全生猶許自新特虧令典惶怖殞越夙夜載馳雖荷
殊渥尚憂嚴命臣兄合從連坐伏待貶官不謂元造曲成
鴻私下覆在憂惕之際特授寵榮當譴斥之時忽承遷轉
品秩下降清望有加復齒周行獲陪班列向非親紆聽斷
俯燭幽微則骨肉分竄于殊方簪裾永絕于昭代豈望更
玷人次再沐朝奉罪重邱山恩過天地感戴慙赧俯伏驚
惶臣竊自思惟無所上報庶將懲改前過克勵殘骸苦節
誓心冀申萬一無任感恩惶懼之至

謝贈官表

臣哀言伏奉今日恩命臣亡祖故慶王文學先臣楚珪贈兵部尚書亡祖母王氏贈齊國夫人亡父故京兆府三原縣丞贈給事中先臣無爲贈太子太保亡母南陽縣太君張氏贈鄧國夫人仍賜立私廟三室慈旨忽臨憫冊加等哀榮頓極感涕交流今日殺身此生分足臣哀中謝臣聞德及於人功濟於物然後光昭祖考特加追命之榮崇嚴廟室俾展奉先之敬臣授任非據尸位已淹合上叩公朝退身私第顧以未裨神化誓答皇慈尚塵青瑣之闈猶汗

玉堂之署乾坤施厚歲月恩深趨進崇階坐封故郡如臣
之比罕見其倫今又念及先臣旌其內訓寵以六官之長
榮極三師之列魚軒表于東海翟茀賦于南都宗祏有儀
春秋有祀變其士祭之禮被其公服之章昭穆偕昇感懷
泣血永惟臣之祖父業茂文儒夙荷重名不躋通列微夫
小子實忝前人才薄位高上慙無地夙夜感切啟處不寧
豈謂寵臨薦加志願俱畢人子之道聖睿曲成情禮之間
私門獲遂屬當禁火歸省先塋便奉除書以時昭啟灑雨
露於松柏懸日月於邱封閭里相榮故老垂泣不圖存沒

頓極于斯寵渥殊常戴荷失次於家出望於國無勞惶報
踧踖不知所報無任感慶屏營之至謹奉表陳謝以聞

謝妻封宏農郡夫人表

臣某言伏奉恩命賜臣妻楊氏邑號封宏農郡夫人伏以
古者卿大夫之妻咸曰命婦亦曰內子但有稱謂皆無封
邑其後雖有石窳延鄉之錫亦無夫人之號唯漢魏戚里
晉宋外家平源清河疏郡以馭貴建昌高密啟邑以睦親
猶止于郡縣君而已近代著令國朝相襲階至三品妻封
夫人上比鵲巢遠齊翟裼禮秩兼盛等威稍逾其或襄贊

勲臣光華戚屬以茲而授尚可相循臣以凡賤謬承委遇尸職已久愧心匪寧仰酬國恩分寸未展內省家事慈渥過豐又蒙曲私霑及主饋特封嘉號載錫徽章中壺慶其秩高外姻賀其禮盛儀參貴列寵極私門自顧何功叨榮至此頓逾涯分退益兢惶無任荷戴屏營之至謹奉表陳謝以聞

爲李大夫謝御製詩表

臣某言伏奉恩旨賜臣詩一篇并酒脯文迴睿思忽懸日月之光膳自御廚更覩雲天之樂感恩抃躍受賜兢惶施

已重於邱山功未申於毫髮賞則過望臣何以堪無任感戴悅豫之至謹奉表陳謝以聞臣某誠歡誠喜頓首頓首謹言

謝賜緋表

臣衮言今日內給事潘副宗奉宣勅旨賜臣緋衣一副并魚袋玉帶牙笏等寵自天來恩加望外顧已何幸循涯若驚臣衮中謝臣學愧聚螢才非倚馬典墳未博謬塵良史之官詞翰不工叨辱侍臣之列唯知待罪敢望殊私銀章雪明朱紱霞映魚須在手虹玉橫腰祇奉寵榮頓忘兢惕

蜉蝣之詠恐刺國風螻蟻之誠難酬天造捧戴無力兢惶
在心無任感荷屏營之至

謝進橙子賜茶表

臣某言中使某至奉宣聖旨以臣所進太清宮聖祖殿前
橙子賜茶百串榮賚非次承命兢惶伏以陛下尊元元于
上宮本枝既盛降馨香于嘉木果實自珍常令護領之司
及時採掇以進臣謬當率職正在戎期豈望皇澤之曲臨
寵及下臣之私獻貪天是懼躋地載惶無任

謝內宴賜錦綵器物等表

臣某言伏奉恩旨賜臣內宴仍賜錦綵綾絹四百匹瓶盤
五事衣二副并柑橘等殊常之寵上戴若驚伏惟寶應元
聖文武皇帝陛下恭儉以行禮慈惠以布政式厚君臣之
義爰崇宴饗之道至如醴以命宥幣以將意非有方叔之
勲魯侯之親則不可以禮奉和之樂溥將之也臣以至愚
承弼無益尸官夙夜自惟兢惶失次尚蒙慈恕猶辱樞衡
薦沐鴻私歡承嘉惠接雲霄之上境陪勲戚于內朝宸威
俯臨以戰以悚中食循省實慙孤賤微生遭逢一至於此
睿眷流渥慈賞過豐廣乾坤而行慶俾下臣之受福東帛

加璧申錫在於王庭珍器黃柑浹洽至于歸第拜恩初喜
審分增憂臣實非才事無任効待罪已久冒榮則多況戎
患未寧寅車尚駕聖懷所軫日旰忘勞躬行儉素以濟軍
國臣之俸祿猶合助邊臣之服用敢安私室今又俯霑慶
賞將此勞臣雖宏覆曲全務於均施而丹誠上感實愧無
功不勝荷懼屏營之至

謝端午賜衣及器物等表

臣袞言中使羅希皎至奉宣恩旨賜臣衣二襲金銀器物
十事百索兩軸扇一柄特降王人俯臨私第捧承殊賚祇

荷失圖臣袞誠惶誠恐頓首頓首伏以聖政惟新方求至理天心所待豈止常才在臣庸愚何足驅使自受恩宸宸已積三旬尸素廟堂未有能事固宜歸責誠合避賢聖恩優容寵渥逾厚今屬三陽屆節五日御辰下濟天光曲流睿澤王人班器司服降衣飾其盤盂示以金玉王度總其領會將以黼藻朝章佩色絲而表祥捧輕箑而迎暑寵光逾分憂負難勝出自禁中珍華未覩在於臣下服用敢安既承飾外之恩彌積善中之懼無任感戴屏營之至

謝端午賜衣及器物等表

臣某言中使某至奉宣聖旨賜臣衣兩襲金銀器物十事
扇一柄百索兩軸伏以塵辱台司曠廢事任遭逢若此報
效無聞罪譴未加已荷曲成之施庸愚不逮恐傷則哲之
明所以亟冒宸嚴懇祈罷黜中慈未允外責彌深徘徊渥
恩覩愧朝列四時之錫累沐寵私五日之慶又蒙榮賚衣
服器用特降珍華疵賤凡微曷堪光飾況師旅在外疆界
未寧日費千金簞無半菽今有功之士賞或未周無益之
官寵之過厚已紆成命不敢上辭惶赧拜恩實慙虛受無
任荷懼之至謹奉謝表以聞

謝社日賜羊酒等表

臣某言內常侍王子昇至宣奉聖旨以社日賜臣羊酒脯
腊海味油麵粳米等仍特賜藥飲者喜抃失容兢慙無措
臣誠惶誠悚頓首頓首臣叨踐台階已速官謗聖慈矜宥
殊貸曲全猶使省近掖之文重高門之地白骨再起飛魂
復還感恩若驚雖死何答伏以宰輔之任變和所關自頃
憊陽向逾累月近方降雨今復周旬致令水旱不時陰陽
失序若令歸責臣亦何逃故事昭然所宜黜免且勾龍立
社祀典攸書大稷主農國章斯在以享田祖以報秋成今

穎實未登染盛乖望是君積憂之日是臣獲戾之時豈望
慶自雲天曲容酒食之宴恩霑疵賤下及膏粱之珍醉樂
空比于堯人宰平實慚于漢相無功受賜有覩何逃上戴
寵私益深惶惕無任抃躍屏營之至

謝冬至賜羊酒等表

臣某言中使某至奉宣聖旨以至節賜臣米麪羊酒猪鹿
雜味等伏以非才曠官微臣之愧恥待寬責薄聖造之矜
容貸罪則多負恩已甚進思無補退復何顏以周官之職
且乖于水旱而漢臣之賜空積于歲時屬北陸涸陰南郊

迎日古今良節朝野同休天慈過深榮賚逾厚王人結駟
膳宰駢輜特減內庖之珍遍賜遠方之異光華里閭充溢
門閭臣本布衣列於賤品千年遇聖忽至層霄萬死酬恩
豈裨大化素甘藜糗既飽於梁肉多乏濁醪既醉于醇酎
薦沐非常之寵不知所忝之由少長對筵悲歡相慶何功
而至此何力以任之捧戴若驚慚惶交集無任

謝賜宴表

臣某言臣一昨特荷聖慈曲承寵會今日又奉進止臣兄
太常丞臣某亦霑內宴仍賜錦綵百匹衣一襲并銀器等

非據之任已忝股肱曲成之恩更及骨肉仰天增愧何地
有安臣其中謝臣聞禮之制也以飲食親宗族詩之義也
以愷樂宴嘉賓以通上下之情以展君臣之義將以禪於
風化故無謬於寵私伏惟陛下稽古以理宗儒之教示其
恭儉之訓溥頒雨露之恩叶時布和式崇饗宴至於需以
酒食昭其慈惠必先宗戚次及舊勲臣出於孤賤又乏功
勞無所克堪豈宜齒列臣兄何幸又沐殊榮寵極膳羞之
珍禮優筐篚之至合生成於同氣聚慶賀於私庭昔人猶
咏於鹿鳴在臣兼輝於雁序手足無措揣分空慙形影相

顧捐軀何答臣無任

謝勅書賜臘日口脂等表

臣某言內侍蒙日新等至奉宣恩命賜臣面脂口脂香藥
澡豆并銀餅子等伏以受任以來殊私未答每更節候愧
曠歲時屬元律送寒清霜戒臘陛下爰修大蜡用告順成
既息田夫復祭先嗇臣以涓埃莫効冰炭相仍年穀未登
人財益匱致茲不稔之咎實媿報農之辰兢惶失圖啟處
無地聖慈全宥寵錫過優珍器鮮華蘭膏芳潤以疵賤之
質忽降御香以醜冒之容忽澡天澤省躬無措跪奉何施

粉骨酬恩未伸萬一無任感戴欣懼之至謹奉表陳謝以聞

爲河南魏尹謝官陳情表

臣少游言伏奉恩旨除某州刺史尋即有替又蒙恩除臣京兆尹澤及遐荒榮露枯朽以驚以惕載抃載歡臣少游誠歡誠喜頓首頓首臣名無德稱官偶時來政謝有經文慚無害朝恩早竊班命累塵每食皆浮何官不曠四三年內榮至崇高萬一分中效仍微薄逾涯若此招損宜然頃者獲罪於天躋身無地曲承鴻霈仍佐隼旗省揆責輕寢

興憂負豈圖昭洗瑕穢發生羽毛不次之恩九霄橫落無
階之位四裔超登開散皇明龍銜巨燭捧酬元造鰲戴崇
山且河洛軍興京尹寄切念臣術非鉤距識昧平反將何
以肅清姦回董正人吏自蒙獎擢願見天顏限以阻修未
承勅命傳聞尚惑奔赴終勤以七月一日發自渠州星言
即路久冒炎瘴因成癘疢行役支離轉加沈瘵隙光是迫
草露將危今月四日乘輿至漢中尋問醫藥直省王許仝
至奉宣進止促臣行程震威俯臨精魂飛散進退無措屏
營失圖即以今日驅策殘骸載馳鳳閣猶冀獲全餘喘祇

謁龍顏犬馬之疾久纏螻蟻之誠愈結無任感戴懇迫之
至謹因直省王許佺迴謹奉表陳謝以聞臣少游誠惶誠
恐頓首頓首謹言

代崔公授祕書監致仕謝表

臣某言伏奉恩制授臣銀青光祿大夫祕書監仍聽致仕
臣聞不修其德老當見遺無益於時祿不虛詔伏惟陛下
以大聖撫運以至公宰物凡在爵秩必俟賢能況茲寵異
豈及駑朽臣官歷五朝年逾八十勤勞莫效齒髮久衰舊
好同游索然已盡經行郡國不見一人歡娛且少形魄如

寄古之養老義在師臣必公卿大夫耆年多疾乃有詔書
褒勞之寵靈壽安車之賜不然則高尚之士亦以道存非
閔仲之潔清姜肱之孝行固不可猥承嘉命特受殊禮今
陛下以臣之甥任在樞近階緣厚遇曲被鴻私官品過崇
越於班列疵賤忽貴枯瘁增華親戚相榮以感以涕猶復
恤其羸僊貸以休閑成周禮四方之適存漢儀八月之間
惠養益厚等威益尊冒恩不訾仰戴無力殘生有幾上報
何階無任感戴之至

謝米麪羊酒等狀

右中使某至奉宣恩命以至節恩賜米麴羊酒猪鹿及雜
口味等者聖旨頻降榮賚過優以周官百品之珍載頒其
實雖魏臣五釜之貴豈容其多受賜踰涯拜恩失序臣出
自孤賤素甘貧苦不過滿腹竊誠終身且祭不掩豆飯惟
脫粟昔聖之美其儉可師敢望豐盈重彰尸曠而雨露偏
施歲時益榮俾奉先之饗味兼海陸合族之宴及於膏粱
又沐深慈下霑中饋以感以慶啟處難任無德無功慙惶
罔措無任戴荷兢惶之至

謝勅書手詔狀

右今月十一日中使劉元玉至奉宣慰命賜臣前件書詔
臣謬忝防虞未伸戎効寄分廉察又乏吏能尸素實深咎
責難逭聖慈宏貸榮渥累霑俯降天書兼賜墨詔睿詞寵
飾曾無毫髮之勞宸旨密臨時受腹心之寄自驚朽骨遠
被殊恩捧承戰慄拜跪踴躍驚蹇之力過負已多鴻施未
酬慚懼彌積軍州同慶惠澤溥將慰勉載加感悅交集無
任抃躍惶悚之至

社日謝賜羊酒海味及茶等狀

右中使某至伏蒙聖慈賜前件羊酒等臣謬塵重任已積

歲時日有餐錢月受高俸過蒙溫飫常愧有餘內省謀猷
實慚不足益彰尸忝深誠滿盈屬上戊御辰勞農報社賜
兼海陸品極珍鮮上減御食下豐私室何功而受承寵若
驚惶恐拜恩戰懼交集無任戴荷欣抃之至

重九謝賜醪酒等狀

右中使劉君壽等至伏奉恩命賜臣前件醪酒等仍令樂
飲者伏以元月戒時清風應律宜於長久欣聖祚之壽昌
復見芳華喜陽數之重合時恩忽降節賜荐加王人寵臨
御膳分旨膏以粉餌蒸以饴餽綠芋金茅紫蔗筠節茱萸

清酒嘗聞舊俗之傳蕙苾調腸今覩靈珍之味此饗人苑
吏上獻嘉辰豈伊凡品微生下霑殊貺賜宴既聯于伯仲
覃恩更及於室家稠疊寵光低迴隕越一門同慶萬死何
酬

謝每日賜食狀

臣袞言臣聞恩或曲存義不虛受故耆儒碩德方載珍羞
大節殊勲乃加禮食至於列曹分署各置餐錢匪頒王饗
食有公膳陛下勵精庶政垂意輔臣特降非常之慈屢蒙
每日之賜上林果實至必先時大官飧牢送無曠日臣等

自登三事已涉三旬當朝廷釐革之時佐海內安危之重
入趨殿省常奉憂人之旨出在朝堂每思克已之功而不
能陳一策進一賢外無平戎之謀內闕敘官之實四夷未
格百姓未寧不副憂勤合當罪譴更承飫賜實用慚惶既
招折足之嫌將貽滕口之誚伏望重回宸睞載允誠詞俯
停三錫之恩伏免萬方之責則神明或祐官謗不行在微
臣再受多福無任懇迫悚懼之至

謝賜鹿狀

右中使祁國俊至奉宣恩旨以前件鹿稍覺鮮好特以賜

臣者謬竊和羹之任累承分食之恩無補涓塵叨霑雨露
上戴洪造內愧素餐伏以陛下順時令以宣風展春蒐之
彝典有司奉職上苑從禽將備御庖獻茲鮮獸宜供六膳
以副八珍臣實無功何以受賜寵承殊渥味則非時顧調
飪而空慚荷生成而何答無任感恩悚抃之至

謝賜甘蔗芋等狀

右今月某日喬某至奉宣恩命賜苑中所種甘蔗及芋等
其形豐其味甘曲被生成之恩宛同吳蜀之物過蒙頒錫
伏用驚喜陛下以萬靈效祉六合同風養之則生孰云其

遠化之自我不隔華夷將有絕域之人服中州而稟教故
使他邦之產歸上苑而咸植既登天膳實表地成太和之
理於斯可見捧承異貺兢跼素餐感戴之誠倍百恒品不
任受恩悚懼之至

謝恩賜春衣狀

右今月五日監軍某乙差行營十將某乙送正月十二日
書詔并賜臣衣三副軍將二人衣二副跪伏捧承惶悚殞
越臣素以愚懦昧於吏能虛受寵私豈堪任使謬承條察
吏法非明忝司訓練戎行不肅今之曠職獨有微臣宜懲

冒榮以勵分鎮豈謂特迴聖睠俯示天書曲降宸慈再加
墨詔下頒春服遠被時恩獎飾逾涯兢惶失次載光師旅
仍錫偏裨誓以捐軀期於上報無任慶抃悚踴之至

謝賜馬狀

右中使某奉宣恩旨賜臣前件馬臣竊位台司已招官謗
未申薄効遽沐殊私捧荷驚惶心魂震越上慚慈睠下愧
周行素無致遠之資益懼負乘之咎無任感戴之至

進貞懿皇后哀冊文狀

右奉進止令臣撰詞訖謹隨狀封進伏以纂述坤儀宏宣

聖悼禮有追冊文以敘哀前代以來舊章不易屬詞之重
高選文臣晉之恭后則王彪之顏延年咸製其詞哀華著
稱至貞觀中文德皇后遷座特詔虞世南撰述編於文館
永播徽音此三臣者皆以鴻藻奮於一時用能紀皇壺之
風煥青史之簡臣才學甚淺典策非工承詔兢悚匪遑夙
夜伏自循省叨竊至深陛下往命貴妃追封殊號冊諡之
令皆臣奉行德範柔明多所遺闕退思鄙薄於今愧赧況
又獲承慈旨重紀芳猷雖竭庸虛慚無藻麗屬文明天下
多士盈朝顧其式瞻何以昭示冒嚴上獻益用兢惶無任

戰懼之至